



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KEEMPAT
MESYUARAT KEDUA**

K A N D U N G A N

UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Usaha Pemulihan Imej Malaysia Dalam Kalangan Pelancong Antarabangsa Setelah Negara Dilabel Sebagai 'Kerajaan Gagal Mengurus Pandemik' Serta Kesukaran/Perubahan S.O.P Pelancongan**
- *YB. Datuk Haji Hasanuddin bin Mohd Yunus (Hulu Langat)* (Halaman 1)
- **Cadangan Pembinaan Jambatan Kekal di Jalan Kampung Bali (A112)**
- *YB. Tuan Sivakumar Varatharaju Naidu (Batu Gajah)* (Halaman 3)

**MALAYSIA
KAMAR KHAS
PARLIMEN KEEMPAT BELAS
PENGKAL KEEMPAT
MESYUARAT KEDUA**

Selasa, 23 November 2021

Mesyuarat dimulakan pada pukul 2.30 petang

DOA

*[Timbalan Yang di-Pertua (Dato' Mohd Rashid Hasnon)
mempengerusikan Mesyuarat]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

**Usaha Pemulihan Imej Malaysia Dalam Kalangan
Pelancong Antarabangsa Setelah Negara Dilabel
Sebagai 'Kerajaan Gagal Mengurus Pandemik' Serta
Kesukaran/Perubahan SOP Pelancongan**

2.34 ptg.

Datuk Haji Hasanuddin bin Mohd Yunus [Hulu Langat]: Tuan Yang di-Pertua, Yang Berhormat Timbalan Menteri. Sejak beberapa bulan lalu, media sosial antarabangsa kerap memaparkan bahawa Malaysia ditadbir oleh sebuah 'Kerajaan yang Gagal' khususnya dalam mengurus pandemik sehingga menakutkan bakal pelancong-pelancong asing melawat ke Malaysia.

Kesukaran dan perubahan SOP yang kerap berlaku melibatkan pelbagai kementerian membuatkan bakal pelancong menjauhi Malaysia dan memilih negara-negara jiran sebagai pilihan mereka, selain menjadikan negara Islam lain seperti Turki sebagai pengganti kepada Malaysia.

Apakah Kementerian Pelancongan, Seni dan Budaya Malaysia akan mengetuai usaha memulihkan imej Malaysia di mata dunia melalui pejabat-pejabat Tourism Malaysia (TM) di luar negara sedia ada, serta menambah pejabat-pejabat baharu seperti di tempat yang berpotensi seperti Qatar atau Bahrain di Timur Tengah agar industri pelancongan negara dapat dipulihkan semula sekali gus menaikkan aktiviti ekonomi domestik. Tuan Yang di-Pertua, saya memohon pihak Kementerian Pelancongan, Seni dan Budaya Malaysia untuk memberi penjelasan segera bagi memastikan persepsi pelancong-pelancong luar tidak akan menjejaskan industri pelancongan negara dalam jangka masa panjang ini. Sekian, terima kasih.

2.35 ptg.

Timbalan Menteri Pelancongan, Seni dan Budaya [Datuk Seri Dr. Santhara]: Terima kasih, Tuan Yang di-Pertua. Sebelum saya meneruskan jawapan kepada pertanyaan yang diajukan oleh Yang Berhormat Hulu Langat pada hari ini, saya ingin memberi sedikit maklumat berhubung peranan dan

fungsi kementerian dan agensi kerajaan yang terlibat kepada isu dan persoalan yang telah diajukan oleh Yang Berhormat.

Untuk makluman Ahli Yang Berhormat, antara peranan yang dimainkan oleh Kementerian Pelancongan, Seni dan Budaya (MOTAC) adalah melaksanakan promosi bagi menarik minat pelancong asing dari seluruh dunia untuk melawat dan melancong ke Malaysia. Manakala Kementerian Luar Negeri adalah menjadi agensi peneraju kepada segala usaha penerangan terhadap dasar, keadaan semasa, isu-isu tertentu dan sebagainya kepada negara-negara luar melalui pejabat Suruhanjaya Tinggi dan Kedutaan Besar Malaysia di seluruh dunia.

Sementara itu, Majlis Keselamatan Negara dan Kementerian Kesihatan merupakan agensi peneraju yang mengetuai dan menyelaras pengurusan pandemik COVID-19 di Malaysia. Berhubung dengan perubahan SOP pula, adalah dimaklumkan bahawa ia bukanlah kerana perubahan dasar atau *flip-flop* tetapi perubahan SOP kepada yang lebih ringan adalah selaras dengan peralihan fasa di sesuatu negeri atau tempat berdasarkan Pelan Pemulihan Negara.

Justeru itu, saya berharap Yang Berhormat kini lebih jelas dengan peranan yang dimainkan oleh Kementerian MOTAC dan agensi kerajaan bagi isu-isu yang dikemukakan oleh Yang Berhormat serta faktor atau sebab perubahan SOP oleh Majlis Keselamatan Negara. Maka, istilah yang mengatakan 'Kerajaan Gagal' adalah tidak sesuai. Maka, kita telah jalankan yang terbaik.

Tuan Yang di-Pertua, MOTAC melalui pejabat-pejabat Tourism Malaysia di luar negara sentiasa giat melaksanakan peranannya dalam mempromosikan Malaysia sebagai destinasi pilihan utama pelancong. Antara perkara utama yang dipromosikan pada masa ini adalah memberi keyakinan kepada para pelancong bahawa Malaysia adalah destinasi yang selamat untuk dilawati, terutamanya dengan memberi tumpuan (*highlight*) yang lebih kepada perkara-perkara yang telah dilaksanakan dalam memastikan semua pihak yang terlibat dalam industri pelancongan negara bersedia dan mengamalkan amalan yang terbaik industri dalam norma baharu.

Antara inisiatif yang dijalankan bagi tujuan ini adalah penerbitan video-video promosi pendek berdurasi antara dua hingga tiga minit untuk memastikan Malaysia sentiasa berada dalam ingatan dan pertimbangan pelancong dalam memilih destinasi untuk mereka lawati kelak. Ini termasuklah video berjudul '*It's All Here*', yang diterbitkan dan '*Safe Travel – Enjoy Your Holiday*' yang akan dikeluarkan (*release*) dalam masa terdekat. Video-video ini telah dan akan dimuat naik ke media-media sosial kementerian dan juga Tourism Malaysia, rakan-rakan strategik seperti syarikat penerbangan serta diedarkan melalui pejabat-pejabat Tourism Malaysia di luar negara.

Selain itu, pejabat-pejabat Tourism Malaysia (TM) di luar negara juga mengadakan aktiviti-aktiviti dalam talian, dengan izin, *online* seperti *webinar* dan konsultasi berterusan dengan pihak-pihak berkepentingan seperti penyedia pakej pelancongan ke Malaysia. Pada masa yang sama, Tourism Malaysia turut memberi penyertaan daripada agensi-agensi kerajaan negeri seperti *Sabah Tourism Board* dan *Tourism Perak* serta yang lain-lain. Usaha ini tetap diteruskan walaupun ketika pelaksanaan Perintah Kawalan Pergerakan (PKP) di Malaysia dan sempadan negara masih ditutup untuk tujuan pelancongan.

Untuk makluman, sebanyak 485 program-program promosi secara dalam talian telah dijalankan pada tahun 2020 bagi mempromosikan destinasi dan

produk pelancongan negara. Manakala pada tahun ini pula, sehingga bulan Oktober 2021, sebanyak 364 program-program promosi secara dalam talian telah dilaksanakan. Antara program yang telah dan akan dilaksanakan pada tahun ini adalah seperti berikut:

- (i) Pejabat Tourism Malaysia Jepun telah mengadakan *Malaysia Online Seminar* dan *Malaysia Update Seminar* dengan kerjasama Japan Association Travel Agent (JATA), Duta Jepun di Malaysia dan beberapa kerajaan negeri untuk meningkatkan lagi keyakinan bahawa Malaysia sebagai destinasi pelancongan selamat untuk dikunjungi pasca-COVID-19;
- (ii) menganjurkan *Malaysia Business-to-Business (B2B)* dengan izin, *Digital Educational Tool Powered* dengan kerjasama bersama *The Pacific Asia Travel Association (PATA) Germany*;
- (iii) *Vakantiebeurs-Online Travel Festival* dan '*I Travel Show*';
- (iv) *Discover and Enchanting Sabah* dengan kerjasama *Sabah Tourism Board* dan *Turkish Airlines*; dan
- (v) AEROMEET yang akan membabitkan 223 pengusaha pelancongan (*tour operator*) dari benua Amerika, Eropah dan Oceania.

Penyertaan di program-program promosi dalam platform antarabangsa adalah berterusan dan akan memberi penekanan bahawa Malaysia adalah destinasi yang selamat. Sesi libat urus *Online Travel Agents (OTA)* atau *One Stop Centre (OSC)* seperti TripAdvisor bagi memastikan inisiatif-inisiatif ini mendapat publisiti di platform seperti ini.

Tuan Yang di-Pertua, berhubung dengan cadangan menambah pejabat Tourism Malaysia luar negara. Pada masa ini, Tourism Malaysia tidak mempunyai perancangan untuk menambahnya. Hal ini kerana sebarang penambahan perjawatan dan pejabat di luar negara perlu mengambil kira pelbagai faktor, terutamanya implikasi kewangan yang tinggi. Walau bagaimanapun, program-program promosi tetap akan diteruskan oleh Ibu Pejabat serta Pejabat-pejabat Cawangan Tourism Malaysia di dalam dan juga di luar negara seperti yang telah sedia ada.

Pada masa yang sama, pegawai Tourism Malaysia di luar negara turut boleh membuat promosi di negara-negara berhampiran dengan kedudukan pejabat mereka sedia ada. Sebagai contoh, pegawai kita yang berada di Pejabat Tourism Malaysia di Paris boleh hadir dan melaksanakan aktiviti promosi secara fizikal di Sepanyol atau Portugal jika perlu mengikut *region* tersebut. Berikut adalah jawapan yang telah diluluskan oleh KSU Kementerian Pelancongan, Seni dan Budaya untuk saya bacakan. Terima kasih.

**Cadangan Pembinaan Jambatan Kekal di
Jalan Kampung Bali (A112)**

2.42 ptg.

Tuan Sivakumar Varatharaju Naidu [Batu Gajah]: Terima kasih, Tuan Yang di-Pertua. Hari ini saya membawa isu kawasan iaitu cadangan pembinaan

jambatan kekal di Jalan Kampung Bali (A112). Tuan Yang di-Pertua, Jalan Kampung Bali, Tronoh adalah merupakan satu jalan utama yang penting di kawasan ini. Pada tahun 2017, kerja-kerja membaiki pulih dan menaik taraf jalan tersebut telah dilaksanakan oleh pihak JKR. Kerja-kerja tersebut telah pun siap dibina.

Akan tetapi, pihak JKR telah membina sebuah jambatan sementara di Jalan Kampung Bali (A112). Jambatan sementara itu masih kekal sehingga hari ini. Didapati jambatan sementara itu rosak dan tidak selamat digunakan untuk jangka masa yang panjang. Saya telah membawa perkara ini kepada perhatian pihak JKR.

Saya difahamkan bahawa kekangan kewangan menjadi alasan untuk tidak membina jambatan kekal di jalan tersebut. Saya sungguh berharap bahawa Kementerian Kerja Raya akan menyalurkan dana yang secukupnya untuk menggantikan jambatan sementara dengan satu jambatan baharu yang selamat digunakan oleh orang ramai. Dana ini boleh diperuntukkan dalam Belanjawan 2022. Saya mohon pertimbangan Menteri Kanan Kerja Raya melaksanakan projek ini secepat yang mungkin. Sekian, terima kasih.

2.44 ptg.

Timbalan Menteri Kerja Raya [Datuk Arthur Joseph Kurup]: Terima kasih, Tuan Yang Di-Pertua. Terima kasih Yang Berhormat Batu Gajah. Untuk makluman Ahli Yang Berhormat, Kementerian Kerja Raya sentiasa komited untuk menyediakan kemudahan infrastruktur jalan raya yang terbaik untuk keselamatan dan keselesaan rakyat dan pada masa yang sama, dapat menjadi pemangkin kepada pembangunan sosioekonomi negara.

Kementerian ini mengambil maklum akan cadangan Ahli Yang Berhormat untuk pembinaan jambatan kekal di Jalan Kampung Bali (A112), Tronoh, Perak. Semakan kementerian ini telah mendapati Jalan Kampung Bali adalah Jalan Negeri dengan nombor laluan A112. Sehubungan dengan itu, cadangan pembinaan jambatan kekal di laluan berkenaan adalah di bawah bidang kuasa Kerajaan Negeri Perak.

Kementerian ini dimaklumkan oleh Jabatan Kerja Raya (JKR) Negeri Perak bahawa cadangan projek pembinaan jambatan kekal di lokasi tersebut telah dimohon untuk dilaksanakan di bawah peruntukan Kerajaan Negeri Perak dalam Rancangan Pembangunan Negeri Perak Kedua Belas (RPP-12).

Walau bagaimanapun, pelaksanaan projek ini tertakluk kepada Kerajaan Negeri Perak berdasarkan keutamaan tahun semasa dan peruntukan yang akan diluluskan. JKR Negeri Perak juga memaklumkan bahawa jambatan sementara sedia ada merupakan jambatan Bailey yang telah dipasang sebagai jambatan sementara sebelum jambatan kekal dibina. Penyenggaraan dan pemeriksaan jambatan tersebut dilakukan secara berkala setiap tahun bagi memastikan jambatan sentiasa berada dalam keadaan baik dan selamat untuk digunakan oleh pengguna jalan raya. JKR Negeri Perak juga telah menggantikan *decking* jambatan Bailey di lokasi berkenaan pada pertengahan tahun 2021.

Untuk makluman Ahli Yang Berhormat, berdasarkan Akta Jalan Persekutuan 1959 [Akta 376], bidang kuasa kementerian ini adalah tertakluk kepada Jalan Persekutuan sahaja. Selaras dengan fasal 1, Perkara 80 Perlembagaan Persekutuan, kuasa eksekutif Persekutuan atau negeri adalah

tertakluk kepada perkara yang terletak di bawah bidang kuasa Persekutuan atau negeri yang disenaraikan dalam Jadual Kesembilan, Perlembagaan Persekutuan. Sehubungan dengan itu, apa-apa kos pembangunan yang melibatkan perkara di bawah senarai Persekutuan akan ditanggung oleh Kerajaan Persekutuan manakala apa-apa kos pembangunan yang melibatkan jalan negeri akan ditanggung oleh kerajaan negeri.

Walau bagaimanapun, cadangan projek tersebut boleh dipertimbang untuk dilaksanakan menggunakan peruntukan pembangunan Persekutuan di bawah kementerian ini sekiranya jalan berkenaan diwartakan kepada Jalan Persekutuan terlebih dahulu selaras dengan seksyen 3, Akta Jalan Persekutuan 1959 yang memperuntukkan bahawa Yang Berhormat Menteri Kerja Raya boleh mengisytiharkan mana-mana Jalan Negeri, jalan pihak berkuasa tempatan atau jalan swasta sebagai 'Jalan Persekutuan' setelah dipersetujui oleh pihak-pihak berkuasa yang berkenaan.

Dalam perkara ini, Kerajaan Negeri Perak hendaklahewartakan Jalan Kampung Bali (A112) tersebut kepada Jalan Persekutuan supaya cadangan projek ini boleh diteliti dan dipertimbang untuk diangkat kepada Agensi Pusat, tertakluk kepada keutamaan negeri dan ketersediaan agihan siling peruntukan pembangunan Persekutuan bagi kementerian ini. Sekian dan terima kasih.

Timbalan Yang di-Pertua [Dato' Mohd Rashid Hasnon]: Terima kasih Yang Berhormat Timbalan Menteri. Ahli-ahli Yang Berhormat, Mesyuarat Kamar Khas ini ditangguhkan sehingga jam 2.30 petang, Rabu, 24 November 2021. Terima kasih, Ahli-ahli Yang Berhormat.

[Kamar Khas ditangguhkan pada pukul 2.49 petang]